

FILED

JUN 27 2025

ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

Jack Jorbon, Riabnono, v. Rien Michael and Anke Laelang, Rijumae Abnono.	CIVIL ACTION NO. 2023 – 01720 HCT/LAND/MAJ LEMNAK & UWAK EO AN COURT EO AN MANIT
---	---

Nan: Hon. Carl B. Ingram, Chief Justice of the High Court
Mr. Jack Jorbon, Plaintiff *Pro Se*
Chief Public Defender Russell Kun, Counsel for Defendants

I. Naan in Kopellok

Elkin an etale jemlok eo an Court in im ear file ilo Jun 14 raan, 2024 eo, High Court eo ear
lelaltak ruo kajitok ko bwe Count in en uake ilo May 26 raan, 2025 Order eo an:

1. Rijumae Abnono Rien Michael emaron in ke kadredreiklok im jokwe ilo mweo ej kalok ilo
Arkan Weto ilo an ejelok melim jen Riabnono Jack Jorbon eo ej kabwijer maron ko an Alap in
Senior Dri Jerbal jimor, einwot ke melim eo nan an kalok im amnak ilo imon jokwe eo an jen
ibben Iroijedrik Walter Laelang ej juon karok eo ejjab jimwe im ekkar kinke ejuur manit eo
naetan, jab komakut drekein jenme eo; im
2. Elane Rien Michael ej kio maron in wonmanlok wot im kadredreiklok im jokwe ilo mweo ej
kaloke ilo an ejelok melim jen Riabnono Jack Jorbon, ta eddo ko an Rien Michael iumin mantin
Majol nan Jack Jorbon im ej ke mottan wot eddo kein, ne enaj wor, jaan in kollaiki an kojerbale
bwidej eo?

II. Etale & Komelele Ko

Ilo an Court in kile im kautej karokan ajelok eo an Leroij Kalora Zion kin maron ko an Alap im Senior Dri Jerbal nan Jack Jorbon. Wawein ajelok eo an ej bedbed iumin mantin Majol eo *jab komakit drekein jenme eo* im ej bareinwot kipel ro tokelik im renaj binej jenkwon ilo Arkan Weto. Ro rar bok maron tokalik - Iroijedrik Kelai Nemna, Iroijedrik Walter Laelang, im Iroijedrik Anke Laelang - rej aikuij loor karok eo an einwot ro rej binej jenkwon. Court in ej bareinwot bok an melele jen Jemen-ei eo im eon ko rejelet karkan jabrewot ajelok ko kommani ilo bwidej ko ilo Majol im kameejlok ke ej juon bedbed eo ej drebij mantin Majol im laajrak ko ion bwidej kein ad. *Eon 1(2) in Article X in Jemen-ei eo an Aelon kein* ej ba bwe ilo an ejelok melim jen *aolep* ro rej kabwijer maron ko ion bwidej iumin manit, innem karkan ajelok ak waikake eo an bwidej eo ejjab jimwe im ejumae kakien.

Kin menin, melim eo lelok nan Rijumae Abnono Rien Michael nan kalok imon jokwe eo an ej juon wawein eo ejjab jimwe im ejumae kien elane ejelok an Riabnono Jack Jorbon erra kake einwot juon eo ej kabwijer maron ko an Alap im Senior Dri Jerbal ilo Arkan. Ej aikuij bok melim eo an Riabnono Jack Jorbon mokta jen an kadredreiklok an kalok imon jokwe eo an im amnak ie.

Ikijen kajitok eo kein karuo an High Court, Court in ej bok an melele jen wawein ko rejelet mantin Majol eo naetan, mantin bwidej, einwot waan jonak ilo an kajeon in bukot mejlan uake kajitok eo elane Rijumae Abnono eo emaron ke wonmanlok wot kake jerbal in ekkal ko an mekarta ejelok melim jen eo ej kabwijer maron ko an Alap im Senior Dri Jerbal, im ne aet, ta eddo ko, ne ewor, an Rijumae Abnono eo nan Riabnono Jack Jorbon iumin manit im ej ke koba kolla ko.

A. Mantin Majol Ilo Ad Jela Nae Dron

Mantin bwidej ej wawein ko rej bok jikier ikijen maron ko, eddo ko im wawein ko jet ikotaan ro aer bwidej eo im rej kabwijer maron ko ion bwidej im ro rej jukjuk im amnak ion bwidej eo ilo aer mour ie im kojerbale. *Peter v. Napking et al.*, CA 06-163 (09/16/08). Ej mantin Majol eo in im ej kipel armij bwe ren jela nae dron, im ej manit eo ej kalikare elon kain wawein ko, ekoba eddo ko an Iroij eo ilo an lale im kojbarok armij ro doon im bwidej eo ilo an kommani tartok in bebe ko an bwidej bwe ren emman

jokkier im ekkar, im eddo eo ej kipel armij ro bwe ren jela kunaer im loor tartok in bebe ko an bwidej jen Iroi eo. *Riiti J. A. Tobin, Land Tenure in the Marshall Islands* at 4-5, 7 (1952).

Ijelokin mweiuk ko buki einwot maan pein ilo an jibaroklok im kajitok melim nan kalok imon jokwe eo ilo bwidej eo, emaron wor menin lelok ko jet ilo tore en ej dredrelok im bin juon kwoon, einwot kein ekkan ak mottan mona ko, jaan im mweiuk ko jet. Ne enaj jarjar juon kwoon nan lease ak kojerbale bwidej eo, ak juon pepa in wia kake tokelik, wawein eo ekka an walok ej ilo an wor melim jen ro rej kabwijer maron ko nan kalok imon jokwe ko ion bwidej eo ilo an ejelok pepa ak bujen kwoon in kojerbale bwidej eo. Melim in ej juon melim eo lelok nan jabrewot im maron in bar boke im kajej tokjen. *Rusin v. Jeilar et al.*, (Opinion & Answer of the TRC) CA 2023-00393, Nov. 08, 2024; *Lokar v. Latak*, 6 TTR 375.

Ilo an wor kain wawein in ej bok jikin, ro rej kabwijer maron ko ion bwidej eo remaron, jen ien nan ien, ak ilo ien ko raurok (einwot waan jonak, ilo ien kotak iju eo jemlokin kajojo iio, ilo ien mij, mare, ak ko jet raurok), komman tartok in bebe ko ion bwidej nan armij ro bwe ren jiban kin jaan ak money ko im mweiuk ko im jemaron in ba ke ej juon wawein aer kolla wonan aer jukjuk im amnak ion bwidej eo. *Napking*, *supra*; *Bar riiti Tobin*, *supra* ilo 5. Ak, emaron wor borwaj (einwot ilo waan jonan, aolep borwaj ren boklok menin lelok ko kajojo allon ak aolep jilu allon) rej bok jen kajojo borwaj ko iumin manit ikijen tartok in bebe ko ion bwidej. *Id.*, *Napking*.

Ilo wawein in, Court in ej tomak ej aikuij wor jerbal in etale ko nan ro ewor aer imon jokwe ilo Arkan Weto, ekoba Rijumae Abnono Rien Michael, im ta ko rekar bok jikin kotaan armij rein rej jukjuk im amnak ion Arkan ibben Iroi Jedrik Walter Laelang ikijen jaan im mweiuk ko rekar ekkan lok kaki nan e. Emenin aurok nan ae melele kein bwe en wor bedbed in jerbale im kalikar ta eddo ko an Rijumae Abnono Rien Michael nan Riabnono Jack Jorbon, ekoba kolla ko ilo jaan ak mweiuk.

III. Naan in Kojjemlok

Elkin etale kajitok ko in manit im iminene ko an Aelon Kein, Court in ej loe bwe:

1. Ikijen kajitok juon, Court in ej loe bwe Rijumae Abnono Rien Michael ejjab maron in kadredreiklok imon jokwe eo im amnak ie kinke ejumae kakien ekkar nan eon ko an Jemen-ei en im rej kemlet kin kojbarok mantin aelon kein ikijen bwidej, im einwot ke jemlok eo an Leroij Kalora Zion ej drebdreb wot ekkar nan manit eo ej kemlet bwe jen jab komakit drekein jenme eo, Irojedrik Walter Laelang ej aikuij loor karokan ajelok eo an maron ko an Alap im Senior Dri Jerbal nan Riabnono Jack Jorbon in ear komnan elonlok jen enoul iio ko remootlok.
2. Ikijen kajitok eo kein karuo, Court in ej loe bwe Rijumae Abnono Rien Michael ej aikuij kommane mantin bwidej ko kemlet ium in manit - einwot ekkar, borwaj, tartok in bebe ko ion bwidej - im emaron in koba kolla ko kin jaan ak in weiuk ko einwot wawein kalikare mantin kautej im jela nae dron im kile ro rej kabwijer maron ion Arkan Weto (einwot ilo case in, ro rej kabwijer maron ko an Alap im Senior Dri Jerbal).

Ilo kautej,



Grace L. Leban
Chief Judge, TRC



Nixon David
Associate Judge, TRC



Claire T. Loeak
Associate Judge, TRC

6/27/2025